

QUÆSTIO MEDICO-CHIRURGICA,
 QUOD LIBETARIIS DISPUTATIONIBUS
*manè discutienda in Scholis Medicorum, die Jovis vigesima-septimâ
 mensis Aprilis, anno Domini M. DCC. LII.*

*dominus thes.
 fragmenta lib.
 de volume*

M. JOANNE HERMENT, Antiquiore Scholæ Magistro,
 Medico Regis ordinario, Doctore Medico, Præfide.

*Utrum in arteriarum Vulneribus tutum Hæmorrhagiâ sistenda auxilium, Fungus maximus;
 rotundus, pulverulentus Joannis Bauhini?*

I.



DUPLICI vasorum sanguiferorum genere, arteriis nimirum & ve-
 nis corpus humanum, potissimum constare, nullus est quem lateat. Hæ
 cruore tumentes hunc laticem, uno tractu sedato & placido flumine
 devehunt ad cor; illæ continuo ferè motu pulsantes, sanguinem è corde
 acceptum, subtilim projiciunt in venas. Hæc vasa, sicut & alias cor-
 poris partes, posse lædi, quis ibit inficias? Unde plurima diversi ge-
 neris mala, pro diversa læsionis conditione, hæmorrhagiæ præsertim,
 quæ si artificio quovis non compescantur, totus sanguis per vulnus effluat necesse est;
 hinc tanto subveniendum malo; effluxio cohibenda, mors enim imminet ineluc-
 tabilis. De venarum hæmorrhagiâ non est quoddam sis sollicitus; esto: curam eximet
 compressio vel levior; iratos ad arbitrium compones fluctus. Non ita fidas arteriæ.
 Facilem non admittit cicatricem, indocilis reprimi; appellenti semper obviam patet
 sanguini; nulla parietibus mora, nulla datur quies; indefinenti feriuntur impetu,
 indefinenter reluctantur. Cave igitur; res non sunt in tuto.

Plurimos ab omni ævo, sanguinis cohibendi modos excogitarunt Medici. Nunc
 adstringentibus medicamentis, stypticis modò, aliàs potentiali, aliàs actuali usi sunt
 cauterio. Hippocrati non fuit ignota, neque Galeno comprimendi ars & deligandi.
 Non omnes has methodos retinuerunt neoterici. Has rejecerunt, ut pote infidas, insuffi-
 cientes, & quandoque noxias; illas vero, pro re natâ, felici adhibuerunt cum successu.
 Illorum consiliis & experientiâ freri, ligaturam in maximis rerum angustis, veluti
 salutis anchoram, cum ægotantium solamine quodam arripuerunt Chirurgi. Quanta,
 Eheu secum importet mala, felix qui numquam fuit expertus! Unde nova meritò de-
 sideratur methodus, quæ si diuturnis involuta jacuerit tenebris, ex veterum Medico-
 rum monumentis, felicioribus hodie renovatur auspiciis.

I I.

LIGATURAM magnarum arteriarum in læsionibus celebrare, periculosa ple-
 num opus alex. Enimvero tanta est nonnumquam hujus operationis exequendæ
 difficultas, ut æger in vitâ discrimen incipiat maximum; tam accipitis, funestique,
 non rarò fit eventus, ut partis integræ mortem inferat necessariam. Frequentius,
 Eheu! hujusce veritatis argumentum subministrat aneurysma, quod dicitur tumor
 præternaturalis in arteriâ quâcumque, à sanguine tunicas ipsius distendens, vel in
 partium incumbientium interstitia effuso, unde duas distinguitur in species, in verum
 scilicet & spurium. Causas inter quas vulgò agnoscunt, crebriores annumerantur;
 contusio quâcumque à gravi ictu, tunicarumque arteriæ, sive integra, sive partialis, à
 phlebotomiâ male celebratâ in brachio, punctura, sive solutio. Quando (tentatis antea
 modis omnibus quibus tumor possit dissipari, vel continui solutio uniri) ad operationem
 est deveniendum, si incipiat ligatura in ipsum arteriæ truncum, qui exilissimos, aut
 nullos partis nutriendæ gratiâ emittat ramos, uti quotidiana testatur experientia, cita
 mors partem arripit, reliquum brevi corpus occupatura. Tunc dimidium facti vix
 habes; dolores primos renovare, dira jubet necessitas; ad amputationem confugi-
 dum. Vitam servat æger, sed mancâ, infortupium grave, plurimis ipsâ morte pejus.

A

Licet opportunum satis in amputationibus, tibiarum, femoris &c. hæmorrhagiæ sustinendæ videatur auxilium, ab omni tamen suspicionis labe non est immunis; dum enim fortiter stringuntur fila, moles omnis liganda faciliè potest rescindi, vel siccescente ligatâ illâ mole, fila relaxari, unde recrudescens hæmorrhagiæ metus. Misso tali incommodo, momenti sanè gravissimi, quantis patiens excrucietur tormentis! Horresco dicere. Ipsâ operatione, omnium crudelissimâ, atrociore patitur dolores. Mox ardet febris interior, ferocissimâ invadunt convulsiones, nullâ prorsus arte, nullis superabiles remediis, sapiusque æger, tertio, quartove die, ritè peractâ operatione, omnique cessatâ hæmorrhagiâ, dolore exanimatus perit, & consumptus. Sic non semel vertitur in perniciem spes salutis proxima. Omne igitur tulerit punctum, qui tantis didicerit malis succurrere, qui certam æque ac jucundam detexerit methodum, quæ omnibus valeat providere. Hanc porro plurimis abhinc annis proposuerunt Medici, publicique fecerunt juris; ipsam versari docuerunt in applicatione medicamenti suajusdam, quod dum irruenti sanguini frenum injicit, facilem, tutamque ab omni periculo, cicatricem inducit arteriâ.

I I I.

IDEO sæpius tutis carere præsidii artes judicantur plurimæ, quia sedulo satis non excoluntur animo. Illarum adire penetralia plerique vix curant homines, sicco pede calcantes limina, unde non mirum quòd in rebus maximi momenti deficere videantur non rarò. Feliciori donatam conditione quam cæteras artes, Medicinam nolim existimare; diversas tamen ipsius partes fors eadem non premit.

Jam à longo fuit in votis medicamentum, quod posset ligaturæ vices supplere, quod ipsius gauderet efficaciam, incommodis verò noxique careret. Opus arduum maxime, eòque Medicis omnibus dignum magis, quòd civium utilitati accommodatius! proposuit itaque *Jonnes Baubinus*, Doctor Medicus & Archiater *Basilienfis* fungum quem maximum, rotundum, pulverulentum dicit, sanguinis eruptionibus etiam periculosisimis compescendis aptissimum, cujus accuratissimam more suo descriptionem exaravit in Historiâ suâ Generali Plantarum (a). "Tantum, inquit, "fungus ille assequitur interdum magnitudinem, ut caput hominis facile æquet, aut etiam excedat. "Cute membranaceâ satis firmâ (quæ in principio ex albo cinerea, mox cum tempore livida redditur) undique cinctus, substantiâ partim coherente sed rarâ, eorum instar, quos excipiendis filice chalybeque excussis scintillis præparatos vendunt, colore etiam persimili. . . . sicci levissimi sunt, ut caput humanum singuli æquantes, unciale pondus non excedant.

Passim autem fungus ille crescit in campis, ubi singulis anni tempestatibus colligitur. Notandum quòd in loco sicco debeat assevari. Eò præstantioris est usus quòd nullâ prorsus indigeat præparatione. Digitis enim facillimè detrahitur cutis membranacea, quâ undique cingitur *substantia coherens sed rara*, quæ talis, qualis est à naturâ debet adhereri. Si sistendæ v. g. cujuslibet hæmorrhagiæ vel præceps sese dederit occasio, substantiæ hujusce frustum hiantibus arteriæ labiis imponitur, adeo ut læviori superficie suâ vulnus prospiciat, ipsiusque ora amplitudine suâ excedat. Huic amplius alterum sternitur, amboque simplicissimâ (ut moris est) deligatione in statu continentur. Sic effluxus omnino cohibetur. Sic paucis diebus coalescunt vascula, vulnusque ad perfectam quasi divinitus deducitur sanationem. Mirabundus dubitas? En fidem faciunt, firmant que ipsa *Joan. Baub.* verba: "Sunt, inquit, qui pro certo asserunt vetustiores, (fungos) & jam justam maturitatem transcendentes, præstare ad compescendas sanguinis eruptiones, etiam periculosissimas, quo, & ipsi multorum cum præsentis salutis, uli sumus in eo ipso casu (b). "Quanti sit facienda tanti viri autoritas, evincunt ipsius opera ære perenniora, evincit ipsius omni ævo veneranda in physicis sagacitas! Quæ quidem doctrina de compescendis hæmorrhagiis fungorum opo, apprimè congruit cum *Caroli Clusii* Medici *Arebatensis* observatione (c), quâ evidenter constat methodum hanc veteres Medicos minimè latuisse, illamque olim apud Germanos haud infrequentioris fuisse usus. . . . Eam, inquit *Clusius*, substantiam, fungi spongiosam, exsiccatam, & omni pulvere quem continebat vacuum adservare solent. . . . Illaque uti ad sanguinis fluxum in vulneribus restinguendum, quam ob

(a) J.B. Hist. gen. plant. 1651. 4. p. 73. p. 84. tom. 3.

(b) Id. loco citat.

(c) Spec. 3. gen. 16. fung. pernic. pag. 183.

» causam, suis in officinis pensilem eos ³ habere, plerumque etiam in Germaniæ multis locis observabam. Unde (missis etiam commodis quæ quotidie ab usu fungorum percipiunt veterinarii) jam staret inconcussa propositionis nostræ veritas, ni aliud subministraret argumentum ipsamet fungorum natura.

I V.

VEL partialiter vulnerari potest arteria, vel totaliter. In illo duplici casu, ferè eundem esse propositi fungi agendi modum, conjicimus. Porrò hunc duplici potissimum substantiâ constare, jam supra innuimus, unâ scilicet membranaceâ, satis firmâ quæ rejicitur, alterâ coherente, sed rarâ, totâque molliter villosâ, quæ sola in usum venit. In primo casu, si arteriæ cuiuscumque vulneri (quod ad simpliciore continui solutionem debet reduci) imponatur, incredibili quâ pollet flexilitate vas arcè complectitur, ad figuram ipsius spontè accommodatur compressione quàm accuratissimâ, & maximè æquali; villis suis humore imbibitis, unicuique adglutinator puncto, dum cohæione quâ donatur, ita vulnere labia retinet, ut ea ab invicem discedere non sinat. Sic facillimè, venarum more coeunt, & celerimè, ferè solo naturæ conamine, quæ eò citiùs simplici cuicumque vulneri cicatricem inducit, quò magis approximantur ora. Nec spernenda mirabilis hujus substantiæ lævitas, imò plurimi facienda ex *Galeno*, qui monet, “ut in usu medicamentorum quæ cicatricem inducunt, ea præcaveantur, quæ ad tactum aspera sunt, ut quæ callum potius quàm cicatricem efficiant, sed eligantur ea quæ multam ad tactum lævitatem habeant (a).” Non tam brevi temporis spatio opus fortè abolveret natura, longius que protraheretur vulnere coalitio, nisi adstrictione, licet exiguâ, gauderet ille fungus, quam ipsi nullus, credo, denegabit, si ritè perpenderit accuratam quam habet analogiam cum omnibus fungis, qui arboribus adnascuntur, quosque virtutem hanc participare, non immeritò confidimus. Sic nucis juglandis adstrictionem laudarunt Medici, experti sunt Chirurgi. Uvam quercinam commendat *Encelius* Medicus (b), quâ præstantius nullum in omni fluxu sanguinis expertus est medicamentum. Sic pulvere adstringenti, vel fungo Bovist vulnus jubet adimpleri in operatione aneurysmatis *Anton. Nuckius* Medicus (c). Quid mirum hoc de fungis illis prædicari, si, (quod clamant omnes) nutrantur ex humore superfluo arborum, quibus adstrictoriam inesse virtutem, plebs ipsa, non ignorat. In posteriori casu, si nempe totaliter secta fuerit arteria, posito ad aperturam hujusce fungi frusto, tam avidè circumarripiunt orificiù labia partes lanuginosæ, ipsique adeo tenaciter insiguntur, ut hiatum omnem occludant omnino. Interim appellens humor his villis imbibitur, unde exurgit gluten quoddam mirabile, quod arteriæ parietibus ita adhæret pertinaciter, ut diceret vas hermeticè clausum. *Habent enim qui tales sunt* (fungos audias) *intra se lentorem quemdam concretum & strigmenti modo viscosum* (d). In ulterio rem probationis gratiam vocamus innumera à Clariss. Doctore Medico (e) Parisiensi facta experimenta. Agaricorum ferè omnium, quotquot fungi sunt five fungorum frusta, diversis imposuit arteriis; gluten illud constanti animadvertit observatione submissâque cultro Anatomico arteriâ, illud idem reperiit naturæ ipsiusmet arteriæ factum quasi simile & adunatum; quodque vix credas, soluto horis duabus post deligationem vulnere, jam cessaverat hæmorrhagia absque recrudescentiâ metu vel minimo, obice jam insuperabili. Nuperrimè etiam D. *Brossard* Chirurgus usus est fungo quodam, quem vocant Botanici *Agaricum pedis equini facie*. I. R. H. 562. *Fungum in candidibus nascentem, unguis equini figurâ*. C. B. Pin. *Fungum igniarium* Trag. 243. Hunc autem ad veteres quercus colligi, talique modo præparari narratur. Cultro rescinditur cortex albidus, durus, quo tegitur substantia mollior ac spongiosa, quæ deinde cultro eodem separatur à duriori, filamentosâque substantiâ; mollis postea illa substantia, iteratis mallei ictibus contunditur, donec lævissima sit, digitisque quasi diffusa, hæc in usum adhibetur, in periculosissimis hæmorrhagiis, quod in variorum membrorum amputationibus, felici expertum est cum successu. Sed unde huic maxima accesserit fama, juvat observationem litteris & posteritati mandare. Vir quidam generosus à S. Principis DE CONTI custodiâ, ense vulneratus in ipso arteriæ humeralis dextrâ trunco, tribus abhinc mensibus laborabat aneurysmate quod in tantam ex-

(a) Gal lib. 5. de comp. Med. per gen. cap. 7.

(b) Lib. de re metall. edit. 1557. p. 238. cap. 57.

(c) Exper. Chirurg. exp. 29. pag. 99.

(d) Dioscot. l. 4. cap. 83.

(e) M. Claud. Franc. Grand-clas.

(a) M. Jac.
Verdelhan
Desmoles Doc.
Med. Paris.

(b) D. Mo-
rand,

creverat molem, ut pugnos duos faciliè adæquaret, & jam metus esset ne dirumperetur ca-
tis, unde ad operationem de sapientis Medici (a). celeberrique Chirurgi (b) consilio;
confugit; atque cùm prius de injiciendâ ligaturâ actum fuisset, (quæ in maximum, ne di-
cam certum brachii amittendi periculum conjiciebat ægrotantem) jam laudatus M. Ver-
delhan inauditum antea in hoc casu proposuit modum quo tutò & jucundè sanare-
tur arteriæ vulnus inflictum. Ligaturâ longe tutiorem fungum D. Brossard asseruit,
voluitque applicari; quod quidem adeo felici successit eventu, ut intra unum mensem
ullo sine discrimine, & incommodo induc-ta fuerit cicatrix. Dum igitur in compes-
cendis hæmorrhagiis istius fungi vis benefica celebratur, suæ Medicis commendæ
sunt laudes, nec Joannes Bauhinus suo defraudandus honore; quinimo omni do-
nandus est encomio, cùm primus, suâ commendaverit experienciâ, immortalitati que
consecrarit Medicamentum, quod nec cultro indiget nec malleo, nec ullâ quâvis præ-
paratione, ut vocetur in usum, quod unicuique præsto est, & in quolibet instanti ad
refrenandos sanguinis effluxus etiâ periculosissimos,

V.

MIRANDAM fungi nostri virtutem, quis negaverit? Dum omnes adhibitas
hucusque methodos, stupendâ antecellit efficiaciâ, dum absque ullo vel levio-
ri incommodo, doloris sensu vel minimo, simpliciorique viâ, certam ostentat salu-
tem. Omnem itaque in operatione quâlibet amoveant formidinem, tum ægrotantes,
tum Chirurgi, superveniens illos non terreat hæmorrhagia; jam habent præ manibus
quod ipsos in maximo vitæ discrimine soletur, quod sanguinem quasi divinitus sistat
ferociorem, abjectâ prorsus ligaturâ, quæ certum licet spondere videatur eventum,
in omni casu non ita feliciter succedit, spem amat sapius ludere, plurimaque secum
importat mala. Immenfam fatemur appellentis sanguinis vim, debile verò adstric-
toriam fungi nostri virtutem. Quid refert? Si primas teneat exactissima, & æqualis
quam efficit compressio, nullo prorsus modo dimovenda, si tam arctè vas complec-
tatur ut ne unam quidem cruoris guttulam sinat effluere, vulnerisque labia ab in-
vicem non valeant discedere, quo posito cicatricem efformari necesse est, eoque li-
bentiùs, quòd dolore nullo ab opere suo distrahatur natura; si præterea hujus sit na-
turæ gluten, ut ab irruente sanguine minimè possit excuti. Aliunde nonne scrupu-
lum omnem remonent relata clarissimorum Medicorum experimenta?

Ergo in arteriarum Vulneribus tutum hæmorrhagiæ sistenda auxilium fungus maxi-
mus, rotundus, pulverulentus Joannis Bauhini.

DOMINI DOCTORES DISPUTATURI.

M. Carolus Geille de S. Leger.	M. Franciscus - Joannes Clemens Morand, Regia Societatis Lugdunensis so- cius.	M. Joannes - Jacobus Belle- teste, Scholarum Professor designatus.
M. Jacobus-Ludovicus Al- leau.	M. Martinus Nonguez.	M. Michael - Philippus Bouvan, Professor Regius, & Regia Scientiarum Academia Socius.
M. Claudius - Franciscus Grandclau, STANISLAI Poloniarum Regis, Lotha- ringia & Barri ducis Consi- liarius & Medicus.	M. Ludovicus - Alexander Gervaise.	M. Michael - Josephus Majault.

Proponerebat Parisiis PAULUS LE ROY, Aurelianus, Saluberrimæ Facultatis
Medicinæ Parisiensis Baccalaureus, Theſeos Auctor, A. R. S. H. 1752.

A SEXTA AD MERIDIEM.